



Áveitan

11. tbl. 12. árgangur. Nóvember 2018

Basar kvenfélaganna í Þingborg kl 13-17 á laugardaginn

Munið basar kvenfélaganna 3. nóvember.

Öll innkoma rennur til áhaldakaupa í sjúkrabifreiðar
Heilbrigðisstofnunar Suðurlands.

Fjölbreytt vandað handverk, ásamt glæsilegum kökubasar og kaffisölu
á staðnum.

Kvenfélögin

Starf Grýlu laust til umsókna

Nú er hún gamla Grýla dauð og þess vegna leitum við að manneskju til að ganga í hennar störf. Starfið fellst aðallega í að þvo og bæta föt jólasveinanna milli viðburða á jólavertíðinni, en reynslan sýnir að þeir geta verið bæði hirðulausir og óþrifalegir. Starfið er launalaust.

Nánari upplýsingar má fá hjá formanni Umf. Þjótanda í síma 846-9775 eða á gudmunda89@gmail.com

Breytingar á innheimtu árgjalda

Stjórn Umf. Þjótanda hefur ákveðið að árgjöld félagsins fyrir árið 2018 verði innheimt í gegnum heimabanka. Aðeins ein krafa verður send á hvert heimili, og verða árgjöldin tvö, annars vegar 1.500 kr. fyrir einn til tvo félagsmenn, og hins vegar 2.500 fyrir 3 eða fleiri félagsmenn. Sendar verða kröfur á þau heimili sem undanfarið hafa verið með fólk á félagatali, en einnig verður send krafa á þau heimili þar sem börn og unglingar hafa verið að taka þátt í æfingum og öðru starfi á vegum félagsins.

Eins og í öðrum frjálsum félagasamtökum er valfrjálst hvort fólk borgar, og þær kröfur sem ekki hafa verið greiddar um áramótin næstu verða felldar niður án dráttarvaxta.

Með von um að þetta mælist vel fyrir, **stjórn Þjótanda**

Áveitan í Flóahreppi

Útgefandi: Ungmennafélagið Þjótandi.

Ábyrgðarmenn:

Fanney Ólafsdóttir	fanneyo@emax.is	892-4155
Bryndís Eva Óskarsdóttir	801haholt@internet.is	846-7188
Hallfríður Ósk Aðalsteinsd.	halla@floahreppur.is	845-9719
Ellen Bachman Lúðvíksd.	ellenbach@simnet.is	616-1588

Frá sveitarstjóra

Kæru íbúar og aðrir lesendur

Veturinn heilsar okkur með fallettum og björtum dögum í bland við slyddu og skúri eins og gjarnan fylgir þessum árstíma. Starfsmenn Flóahrepps undirbúa fjárhagsáætlun með sveitarstjórn Flóahrepps og samstarfsaðilum og er stefnt að fyrri umræðu 7. nóvember á 211. fundi sveitarstjórnar.

Vinna við lagningu ljósleiðara er hafin og reglulegir verkfundir eru haldnir á tveggja vikna fresti. Sævar Eiríksson eftirlitsmaður Flóahrepps mun verða í sambandi við ábúendur varðandi lagnaleiðir að húsum. Framkvæmdir hafa staðið yfir í sumar og haust við eflingu vatnsveitunnar og búið að kostnaðaráætla næstu áfanga. Samið hefur verið við Jóhann Helga og co um endurnýjun sparkvallar við Flóaskóla og er reiknað með að framkvæmdir muni hefjast í nóvember.

Kolbrún Skúladóttir hefur sagt upp störfum hjá okkur og mun fara til starfa fyrir Sveitarfélagið Ölfus í lok nóvember. Flóahreppur þakkar Kolbrúnu fyrir vel unnin störf og einstaklega gott samstarf s.l. 3,5 ár og óskar henni velfarnaðar í nýju starfi. Sigurður Þór Emilsson hefur verið ráðinn í 30 % starf hjá Flóahreppi við húsvörslu í Félagslundi og afleysingar í Þingborg.

Tónahátið er í undirbúningi og verður fyrsti viðburðurinn í Þingborg föstudaginn 30. nóvember. Við hvetjum ykkur til þess að fylgjast með nánari auglýsingum, mæta, njóta góðrar tónlistar og gleðjast með vinum og nágrönnum.

Sveitarstjóri Flóahrepps



Skemmtileg vinna – hentug sem aukavinna!

Vilt þú gerast liðveitandi?

Félagsleg liðveisla er persónulegur stuðningur við einstaklinga með fötlun til að draga úr félagslegri einangrun, m.a. til að geta notið menningar- og félagslífs eftir áhugasviði hvers og eins.

Hugmyndafræðin sem unnið er eftir snýst um viðhorf, virðingu og mannlega reisn sem gerir fólki kleift að njóta lífsgæða sem talin eru eðlileg í samfélaginu og leitað sé allra leiða til þess að fatlað fólk geti upplifað, notið og tekið þátt í fjölmörgum athöfnum sem sanfélagið býður upp á.

Frekari upplýsingar veitir Sigurjón Árnason félagsráðgjafi Skóla- og velferðarþjónustu Árneshings í síma 480-1180, sigurjon@laugaras.is eða María Kristjánsdóttir, maria@hveragerdi.is

Umsækjendur þurfa að vera 18 ára eða eldri, ábyrgir, jákvæðir og hafa áhuga á að vinna með börnum eða einstaklingum með fötlun. Umsækjendur þurfa einnig að vera reyklausir með bílpróf og hafa aðgang að bíl.

Vilt þú gerast stuðningsforeldri?

Tilgangur með stuðningsfjölskyldu er að draga úr álagi á heimili barna, veita börnum tilbreytingu og stuðning auk þess að gefa þeim kost á auknum félagslegum tengslum.

Stuðningsfjölskylda býður barninu að dvelja á heimili sínu sem og að taka þátt í daglegu heimilislífi hennar. Um er að ræða 1-2 helgar í mánuði þar sem börnin dvelja á heimili stuðningsfjölskyldunnar. Greiðslur til stuðningsfjölskyldu eru verktakagreiðslur.

Áhugasamir hafið samband við Sigurjón Árnason í síma 480-1180 eða sendið tölvupóst á sigurjon@laugaras.is einnig er hægt að senda póst á Maríu Kristjánsdóttur á póstfangið maria@hveragerdi.is

UPPSKRIFTARHORNÆÐ

Ég vil byrja á því þakka Jakobi kærlega fyrir þessa áskorun. Ég er nú ekki mikið að þvælast í eldhúsinu en þetta er uppskrift að köku sem að mér finnst alltaf rosalega góð.

Skonsubrauðterta

Skonsur

3 egg

1/3 bolli sykur

3 bollar hveiti

3 tsk lyftiduft

1 tsk salt

Mjólk eftir þörfum

Aðskiljið eggin, þeytið eggjahvítunar vel. Þeytið síðan saman eggjarauður, sykur, salt og 2 dl mjólk. Hrærið hveiti og lyftidufti saman við. Bætið mjólk við eftir þörfum. Setjið að síðustu þeyttu eggjahvítunar út í deigið og hrærið varlega saman við.

Bakið á pönnukökupönnu, smekksatriði hvað þið hafið skonsurnar þykkar.

Hangikjötssalat

Hangikjöt í bitum

Soðin egg í bitum

Niðursoðnar baunir og gulrætur

Majones og sýrður rjómi

Slumpað eftir smekk. Öllu hrært vel saman.

Tertan er sett saman og skreytt fagurlega t.d. með eggjum, hangikjöti og grænmeti.

Svo vil ég skora á hann Einar Hjálmarsson á Langsstöðum. Ég er viss um að hann lumar á einhverri góðri uppskrift.

Jón Valgeir í Lyngholti

Frá Villingaholtskirkju

Messa verður í Villingaholtskirkju sunnudaginn 11. nóvember kl.

13.30. Prestur sr: Ninna Sif, kirkjukórinn syngur undir stjórn Inga

Heiðmars organista.

Aðventukvöld verður í Villingaholtskirkju sunnudagskvöldið 9. desember kl. 20.00. Nánar auglýst í næstu Áveitu.

TÓNAHÁTÍÐ Í FLÓAHREPPI

ÞINGBORG

MAGNÚS & JÓHANN

SPILA FYRIR GESTI

NÓV
30

2018

FÖSTUDAGSKVÖLDIÐ
KL. 21

HÚSIÐ OPNAÐ KL. 20

LÉTTAR VEITINGAR TIL SÖLU

MIDAVEÐ
KR. 2.900

MIDAPANTANIR Í SÍMA:

RÚNAR: 898 1535

HALLA: 862 6445

SIGRÚN: 862 1574

FINNDU OKKUR
Á FACEBOOK
UNDIR:

TÓNAHÁTÍÐ
Í FLÓAHREPPI



Flóaskóli – skóli á grænni grein

Flóaskóli er skóli á grænni grein, en það kallast skólar sem sótt hafa um grænfána. Grænfáninn er alþjóðleg umhverfisvottun fyrir menntastofnanir og íbúum Flóahrepps ekki ókunnur því leikskólinn Krakkaborg hefur flaggað grænfána síðan vorið 2018. Vinnan í verkefninu hér í Flóaskóla hefur farið vel af stað og mikill áhugi bæði hjá nemendum og starfsfólki sem svo vonandi kemur til með að skila sér inn á heimilin og út í samfélagið þegar fram líða stundir. En að sama skapi þiggur Flóaskóli allar ábendingar og fróðleiksmola sem samfélagið og íbúarnir geta lætt að okkur. Augljóst er að yngstu nemendur skólans búa yfir dýrmætri reynslu af grænfánastarfi í Krakkaborg. Starfsmenn horfa jafnframt til þess að geta sótt stuðning og hvatningu til starfsmanna Krakkaborgar og má geta þess að nokkrir starfsmenn hafa þegar heimsótt Krakkaborg og kynnt sér starfið þar. Upplýsingar um verkefnið má finna á síðunni www.graenfani.landvernd.is.

Innleiðing á verkefninu „Skólar á grænni grein“ fylgir ákveðnu ferli og var fyrsta skrefið að stofna umhverfisnefnd sem skipuð er fulltrúum nemenda úr öllum árgöngum, starfsfólks og foreldra. Næsta skref var að meta stöðu Flóaskóla út frá eftirfarandi þáttum: neysla og úrgangur, landslag og áttahagar, lýðheilsa, hnattrænt jafnrétti, vatn og orka, loftslagsbreytingar og samgöngur, náttúruvernd og lífbreytileiki. Í matinu kom í ljós að Flóaskóli er nú þegar að gera vel í mörgum þessara þátta en hægt er að gera betur í flestum þeirra. Umhverfisnefnd var sammála um að úrbóta er mest þörf í flokkunum vatn og orka og neysla og úrgangur. Þessi tveir flokkar verða því viðfangsefni verkefnisins eða m.ö.o. þemu grænfánastarfsins í Flóaskóla næstu tvö ár. Sett hafa verið fram markmið í báðum flokkum og aðgerðir til þess að ná markmiðunum.

Við mat á þemanu neysla og úrgangur kom í ljós að þrátt fyrir að flokkun sorps eigi sér langa sögu í Flóaskóla þá er rými til þess að gera betur. Flokkunarílát bæði úti og inni reyndust ekki nógu vel merkt og er hafin vinna við úrbætur á því. Við biðjum því íbúa sem koma sem gestir inn í skóla eða nýta sér flokkunarsvæði skólans að gæta þess sérstaklega að flokka rétt og koma úrgangi eða rusli í viðeigandi flokkunarílát.

Með umsókn um grænfána og þátttöku í verkefninu „Skólar á grænni grein“ stígur Flóaskóli mikilvægt skref í átt að sjálfbærni, en skólar á grænni grein eru stærsta innleiðingartæki til menntunar í sjálfbærni í heiminum í dag (Unesco, 2014). Sjaldan eða aldrei hefur verið jafn mikilvægt að kenna sjálfbærni ekki síst í ljósi niðurstaðna nýrrar loftslagsskýrslu Sameinuðu þjóðanna. Umhverfismál og sjálfbærni eru verkefni samfélagsins alls. Við sem eldri erum þurfum því að vera góðar fyrirmyndir og gott að hafa í huga spakmælið:

„Við höfum ekki erft heiminn frá forfeðrum okkar - við höfum fengið hann að láni frá börnum okkar.“

Með kveðju, starfsfólk Flóaskóla

Glimufréttir - Góð ferð á Reyðarfjörð

Laugardaginn 20. október fór fram Íslandsmeistaramót 15 ára og yngri og 1. umferð í meistaramótaröð GLÍ á Reyðarfirði. Fjórir krakkar úr röðum Þjótanda tóku þátt í barnamótinu og náðu þau öll verðlaunasæti. Þjótandakonan Marín Laufey Davíðsdóttir keppti í 1. umferð meistaramótaraðarinnar og sigraði örugglega bæði sinn þyngdarflokk og opinn flokk kvenna. Úrslit yngri keppendanna urðu sem hér segir:

Stúlkur 11 ára 6 keppendur

3. Svandís Aitken Sævarsdóttir 3 vinn.

Stúlkur 12 ára stærri 5 keppendur

3. Melkorka Álfdrís Hjartaróttir 1,5 vinn.

Stúlkur 13 ára 3 keppendur

2. Erlín Katla Hansdóttir 1 vinn.

Strákar 11 ára 3 keppendur

2. Óskar Freyr Sigurðsson 1 vinn.

Fjórðungsglíma Suðurlands – Skjaldarglímur

Fjórðungsglíma Suðurlands verður haldin að Laugarvatni fimmtudaginn 8. nóvember og hefst keppni kl. 18:00. Keppt verður í flokkum 10 ára og yngri, 11, 12, 13, 14 og 15 ára og fullorðinsflokkum 16 ára og eldri. Skjaldarglímur Bergþóru og Skarphéðins fara fram á sama stað og sama tíma og gefst þá glímufólki innan raða HSK að keppa um þá glæsilegu verðlaunaskildi sem kenndir eru við mæðginin kunnu úr Njálssögu, Bergþóru og Skarphéðinn.

2. umferð í mótaröð GLÍ verður haldin í Vallaskóla á Selfossi laugardaginn 17. nóvember og hefst keppni kl. 13. Áhugasömum er velkomið að mæta og fylgjast með okkar besta glímufólki eigast við í þjóðariþróttinni.

Frá Kvenfélagi Villingaholtshrepps:

Gaman saman í nóvember

Gaman saman samvera verður haldin hjá Sólveigu á Skúfslæk 2 mánudagskvöldið 12. nóvember frá kl. 20.00.

Einnig verður samvera mánudagskvöldið 26. nóvember í Þjórsárveri kl 20.00 eða í heimahúsi ef einhver býður sig fram, nánari upplýsingar hjá formanni er nær dregur. Sjáumst kátar og hressar

Stjórnin

Eldri borgarar í Flóahreppi

Ferð eldri borgara í Flóahreppi verður farin fimmtudaginn 8. nóvember. Farið verður til Hvolsvallar, Lava Center skoðað og drukkið kaffi þar.

Farið verður með rútu frá Guðmundi Tyrfingssyni frá Félagslundi kl. 13, Þjósárverri kl. 13:15 og frá Þingborg kl. 13:30.

Þátttaka tilkynnist í síðasta lagi 5. nóvember til:

Margrétar Gerðum s: 486-3393, 864-1908

Eyðisar Kolsholti s: 486-3324, 695-9223

Sigríðar Hallanda s: 824-5598

Dagskrá mánaðarins

Basar kvenfélaganna í Þingborg	3. nóvember
Glímuæfing	6. nóvember
Æfingar í Þingborg	7. nóvember
Ferð eldri borgara	8. nóvember
Fjórðungs- og skjaldarglíma	8. nóvember
Messa í Villingaholtskirkju	11. nóvember
Gaman saman Kvenfélag Vill.	12. nóvember
Glímuæfing	13. nóvember
Æfingar í Þingborg	14. nóvember
Glímuæfing	20. nóvember
Æfingar í Þingborg	21. nóvember
Gaman saman Kvenfélag Vill.	26. nóvember
Glímuæfing	27. nóvember
Æfingar í Þingborg	28. nóvember
Magnús og Jóhann í Þingborg	30. nóvember

Þorrablót í Þingborg verður haldið laugar-
dagskvöldið 2. febrúar 2019



Eyravegi 32 · Sími 480 1160 · Neyðarnúmer 660 1160